



**Soberania:** Fini parte husi paradigma soberania popular. Katak, komidade mak komponente integrante ida husi estado no bainhira komidade partisipa ativamente iha jestaun no protesau ba Fini hanesan rekursu sosio-kultural, rekursu ekonomia no rekursu ekolojia nian, mak komidade bele sai soberania liu (kbit wain liu iha governasaun ba sira nia riku-soin hotu).

Atu garante interesse to'os nian ki'ik hatur duni iha politika fini ne'e, Hasatil nu'udar Rede ba organizaun agrikultura sustentavel iha papel importante iha dezentu politika fini nasional ne'ebe hala'o ona iha 2012. Hasatil fo sai Hasatil nia espektativa nu'udar sosiedade civil ne'ebé mak hakarak atu proteje no konserva fini local nu'udar identidade nasaun ne'e, liu husi involve an iha inkontru formulaun esbosu, hato'o submisaun, socializa esbosu politika iha distritu no ikus liu sai representante NGO iha konsellu Fini Nasional.

Pontus balun ne'ebé mak fo sai iha politika ne'e mak konaba:

### Introdusaun Politika Fini Nasional

1. Foka liu ba iha kondisaun área ne'ebé uza hodi halo produsaun agrikultura mak 600,000 ha (40 husi total área) no kada uma kain iha deit rai menus husi 2 ha.
2. Iha ai-han prinsipal ba populaun Timor leste nomos ai-han ne'ebé mak ladun uza mos kontribui ba iha diversidade no nutrisaun. Fini ne'ebé mak iha 80% mai husi sistema fini tradisional. Iha parte seluk ajensia governu identifica, dezenvolve no lansa oficial variedade ho "kualidade diak"
3. Hanesan membro Konservasaun Diversidade Biolojiku, Timor-Leste iha papel boot iha manutensaun no haluan diversidade jenetika iha nune'e agrikultor bele asesu ba tipu ai-horis ho variedade oi-oin ne'ebé iha benefisiu no tahan hasoru klima ne'ebé muda, moras no pesti.

### Ambitu Politika Fini Nasional

1. Politika fini ne'e kobre deit ba fini ai-horis hotu ne'ebé uza ba ai-han no agrikultura no ba kualker objektivu komersial hanesan tipu musan, leguminosa, ai-horis ne'ebé produs oliu, modo, ai-fuan, animal nia ai-han, ai-horis plantasaun, temperu, ai-horis medisina, ai-funan, ai-horis ornamentais no ai.
2. Variedade ai-horis categoria ba rua: variedade ai-horis foun no variedade ai-horis local
3. Politika fini ne'e la kobre ai-horis ne'ebé moris iha ai-laran ne'ebé la kuda husi agrikultor, fini animal no ikan.

### Objektivu Politika Fini Nasional

1. Atu garante asesu ne'ebé diak no fornimentu husi variedade ai-horis kualidade diak tuir tempu, kualidade no kuantidade ne'ebé rekere husi agrikultor.
2. Enfatiza produsaun no distribusaun tipu variedade ne'ebé adapta ho sosio-kultura, ekonomia no kondisaun ambiente agrikultor.

### Provizaun politika fini Nasional

1. **Konservasaun no sustentabilidade uza rekursu jenetiku ai-horis.** Politika fini sei fo apoiu ba konservasaun no promove uza rekursu jenetiku ai-horis ne'ebé sustentavel, rekoñese no valoriza agrikultor nia papel.
2. **Dezenvolventu Variedade.** Dezenvolventu ai-horis variedade foun ho kualidade diak hanesan rekerimentu esensial atu atinji produktividade agrikula ne'ebé sustentavel iha Timor-Leste.
3. **Rejistu no protesau Ai-horis variedade foun.** Rejistu no protesau ba variedade foun sei ajuda regula dezenvolventu no uza variedade nia fini ne'ebé iha, fornese insentivu adekua ba investimento iha peskiza no dezenvolventu variedade ai-horis foun

4. **Produsaun Fini.** Produsaun fini kualidade diak husi ai-horis ne'ebé prefere ho kuantidade ne'ebé sufsiente sai hanesan asuntu ne'ebé importante. Politika fini sei estabere padraun kodiku conduta no mata dalan ba produsaun fini kualidade diak
5. **Padraun Fini ho Regulasun Kualidade.** Hodi koko padraun ba kualidade iha fatin mak atu salvaguarda agrikultor nia interesse, assegura produsaun no faan fini ho kualidade aas.
6. **Distribuisaun no Komersializasaun Fini.** Sistema kustu efikas no eficiente ba distribuisaun no komersializasaun fini sei fo asesu ne'ebé diak no tempu ne'ebé lolos ba agrikultor sira konaba kualidade husi fini ne'ebé sira presiza.
7. **Hametin Setor Fini Domestika.** Presiza sektor fini domestika ne'ebé forti hodi bele sustenta produsaun, komersializasaun fini kualidade diak ba agrikultor sira.
8. **Importa no Esporta Fini ho Kualidade Diak.** Timor-Leste presiza importa fini hodi responde fini ne'ebé menus. Timor-Leste mos iha potensia ne'ebe diak atu produs fini no iha potensia atu uza forsa servisu joven sira.
9. **Implementasaun, Koordinasaun no Monitorizasaun Politka Fini.** Aranjamentu instituisaun no rekursu ne'ebé adekua no fundamental tebes ba implementasaun no monitorizasaun Politika Fini Nasional.

#### **Pozisaun Hasatil Konaba Pontus iha Politika Fini Nasional**

1. Iha parte introdusaun presiza mos atu deskreve konaba pratika preserva fini tradisional ne'ebe mak durante ne'e to'os nain halo no adopta ona iha Manual PAD (pratika agrikultura diak) husi MAP.
2. Ambitu pontu 3 sei viola fali provisaun 1 konaba promove no konservasaun in situ ba ai-han fuik no spesies ai-horis fuik. Presiza hare fila fali estementu konaba politika fini la kobre ai-horis ne'ebé moris iha ai-laran no la kuda husi agrikultor.
3. Enkoraja duni governu atu dezenvolve variedade fini lokal hanesan mensiona tamba durante ne'e governu foka liu ba fini introduzida.
4. Enkoraja atu iha partisipatori breeding nune'e to'os nain rasik bele kria no dezenvolve fini ho kaulidade ne'ebe aas.
5. Relasiona ho Konsellu Fini Nasional, presiza hasa'e konesimentu husi membru konsellu atu sira iha kbi'it hodi kontrola no monitoriza politika fini ne'e implementa ho diak.
6. Presiza iha representante to'os nain konsumidor fini iha Konsellu Fini Nasional tamba realidade representate to'os nain ne'ebé iha mai husi grupu habarak fini informal.

Aksaun ne'ebé bele halo relasaun ho Politika Fini Nasional:

1. Mantein pozisaun iha Konsellu Fini Nasional ho ativu
2. Fasilita informasaun fini ne'ebé justu ba membru hotu.
3. Fasilita treinamento ba partisipatory breeding ne'ebe mak envolve to'os nain.
4. Estabelementu banku fini nivel uma kain to'os nain to'o nivel suku
5. Mantein kualidade no kuantidade fini local.

Autór: Permatil

*Publikasaun ne'e produzir ho apoiu husi União Europeia. Ho konteudu eksklusiva ba responsabilidade HASATIL no mos labele, iha kasu ruma, konsidera nu'udar ekspresaun ba posisaun União Europeia"*